

## FEDERALNO MINISTARSTVO FINANSIJA/FINANCIJA

Na osnovu člana 57. stav 2. Zakona o računovodstvu i reviziji u Federaciji Bosne i Hercegovine ("Službene novine Federacije BiH", broj 83/09), federalni ministar finansija-federalni ministar financija donosi

### PRAVILNIK

#### O NAČINU I USLOVIMA IZDAVANJA, OBNAVLJANJA I ODUZIMANJA LICENCI OVLAŠTENIM REVIZORIMA I DRUŠTVIMA ZA REVIZIJU

##### I. OPĆE ODREDBE

###### Član 1.

Ovim Pravilnikom propisuje se način i uslovi za izdavanje, obnavljanje i oduzimanje licence-dozvole za rad (u daljem tekstu: licenca) ovlaštenim revizorima i društvima za reviziju kao način i postupak vođenja registra ovlaštenih revizora i društava za reviziju, u skladu sa članom 56. stav 1. i članom 57. stav 3. Zakona o računovodstvu i reviziji u Federaciji Bosne i Hercegovine ("Službene novine Federacije BiH", broj 83/09, u daljem tekstu: Zakon).

###### Član 2.

U skladu sa članom 5. stav 2. tač. 4. i 5. Zakona, Federalno ministarstvo finansija-Federalno ministarstvo financija (u daljem tekstu: Ministarstvo) izdaje licencu na zahtjev ovlaštenim revizorima odnosno društvima za reviziju.

Licenca izdata ovlaštenom revizoru obavezno sadrži: naziv Ministarstva, pravni osnov za izdavanje licence, naziv licence, ime i prezime, rok važenja licence, registracioni broj, mjesto i datum izdavanja, potpis federalnog ministra finansija i pečat Ministarstva. Licenca je zaštićena vodenim žigom. Obrazac licence je sastavni dio ovog pravilnika (prilog br. 3.).

Licenca izdata društvu za reviziju obavezno sadrži: naziv Ministarstva, pravni osnov za izdavanje licence, naziv licence, naziv društva za reviziju, registracioni broj, mjesto i datum izdavanja, potpis federalnog ministra finansija i pečat Ministarstva. Licenca je zaštićena vodenim žigom. Obrazac licence je sastavni dio ovog pravilnika (prilog br. 4.).

##### II. IZDAVANJE, OBNAVLJANJE I ODUZIMANJE LICENCI

###### Član 3.

Ovlašteni revizor podnosi zahtjev za izdavanje licence Ministarstvu, na obrascu koji je sastavni dio ovog Pravilnika (Prilog broj 1.).

Uz zahtjev iz stava 1. ovog člana, prilaže se:

- ovjerena fotokopija certifikata iz člana 5. stav 2. tačka 2. Zakona izdatog od strane profesionalnog tijela ili nostrificiranog certifikata u skladu sa čl. 9. i 10. Zakona,
- ovjerena fotokopija lične karte ili drugog identifikacionog dokumenta,
- uvjerenje/potvrdu izdato od strane nadležnog organa unutrašnjih poslova da nije krivično osuđivan iz oblasti privrednog poslovanja i sigurnosti platnog prometa,
- uvjerenje/potvrda izdato od strane nadležnog suda da se ne vodi krivični postupak.

Lica koja posjeduju licencu izdatu od strane nadležnog tijela u Republici Srpskoj ili Brčko Distriktu BiH uz zahtjev za izdavanje licence, pored navedenih dokumenta iz stava 2. ovog člana, prilažu i ovjerenu fotokopiju te licence.

Licenca se izdaje na period od tri godine.

#### Član 4.

Na zahtjev iz člana 3. stav 1. ovog Pravilnika ovlaštenom revizoru može se obnoviti/produžiti licenca uz dostavljanje uvjerenja/potvrda iz člana 3. stav 2. ovog Pravilnika i to:

- uvjerenja/potvrde izdate od strane profesionalnog tijela o ispunjenju uslova profesionalnog razvoja i kontinuiranoj edukaciji ovlaštenih revizora u skladu sa zakonom,
- uvjerenja/potvrde izdate od strane profesionalnog tijela da nije podnesena prekršajna prijava ili izrečena neka druga mjera.

Uvjerenja/potvrde iz stava 1. ovoga člana ne mogu biti starija od tri mjeseca od dana podnošenja zahtjeva.

#### Član 5.

Ministarstvo će ovlaštenom revizoru oduzeti licencu:

- 1) na zahtjev Komore, u slučaju da ovlašteni revizor ne postupi po Zapisniku ili ne otkloni nepravilnosti uočene prilikom kontrole kvaliteta rada,
- 2) ukoliko je izrečena pravosnažna presuda i osuđen za krivično djelo iz oblasti privrednog poslovanja i sigurnosti platnog prometa,
- 3) na lični zahtjev,
- 4) ako je prilikom podnošenja zahtjeva za izdavanje licence dao neistinite podatke ili ako u roku od 30 dana nije prijavio Ministarstvu promjene ličnih podataka radi evidentiranja u Registru ovlaštenih revizora.

Ovlaštenim revizorima koji ne podnesu zahtjev za obnovu licence uz ispunjavanje ostalih uslova iz člana 4. ovog Pravilnika zaključno sa danom 08. 04. 2010. godine ranije izdate licence će biti oduzete.

Postupak oduzimanja licence vodi se u skladu sa odredbama Zakona o upravnom postupku ("Službene novine Federacije BiH", br. 2/98 i 48/99), i Ministarstvo donosi Rješenje o brisanju iz

Registra ovlaštenih revizora sa danom konačnosti rješenja. Brisanjem iz Registra ovlaštenom revizoru se oduzima licenca.

#### Član 6.

Društvo za reviziju je dužno podnijeti zahtjev za izdavanje licence Ministarstvu. Zahtjev za izdavanje licence podnosi osnivač društva ili odgovorno lice društva (Prilog broj 2. ovog Pravilnika).

Uz zahtjev iz stava 1. ovog člana se prilaže:

- ovjerena fotokopija izvoda iz sudskog registra,
- ovjerena fotokopija certifikata ovlaštenih revizora, osnivača društva koji čine većinsko vlasništvo u društvu, odnosno ovjerena fotokopija dozvole za rad društva za reviziju (osnivača),
- dokaz o uplati federalne upravne takse,
- ovjerena fotokopija uvjerenja od nadležnog poreznog organa da nema neizmirenih poreznih obaveza,
- ovjerena fotokopija uvjerenja od nadležnog poreznog organa da nema neizmirenih obaveza po osnovu doprinosa,
- ovjerena fotokopija statuta revizorskog društva,
- ovjerena fotokopija internog akta o metodologiji obavljanja usluga revizije,
- ovjerena fotokopija dokaza o zapošljavanju ovlaštenog revizora ili više njih (prijave na zavode za socijalno osiguranje, pojedinačno kao i fotokopije radnih knjižica),
- ovjerena fotokopija dokumenata kojim strana pravna lica, pravna lica iz Republike Srpske ili Brčko Distrikta BiH dokazuju da su u matičnoj zemlji, Republici Srpskoj ili Brčko Distriktu BiH registrirani za obavljanje usluga revizije (Uvjerenje/potvrda od nadležne institucije da je društvo upisano u registar društava za reviziju ne može biti starije od tri mjeseca od dana podnošenja zahtjeva).

Naknada iz stava 2. alineja 3. ovog člana u iznosu 100,00 KM za društvo za reviziju u skladu sa posebnim propisom iz oblasti federalnih upravnih taksi i tarifi federalnih upravnih taksi, uplaćuje se na depozitni račun budžeta Federacije u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH ("Službene novine Federacije BiH", br. 41/09, 46/09, 56/09,63/09, 77/09 i 2/10).

#### Član 7.

Oduzimanje licence vrši Ministarstvo u skladu sa članom 56. stav 5. i članom 68. Zakona.

Postupak oduzimanja licence iz stava 1. ovoga člana vodi se u skladu sa odredbama Zakona o upravnom postupku ("Službene novine Federacije BiH", br. 2/98 i 48/99) i Ministarstvo donosi Rješenje o brisanju iz Registra društava za reviziju sa danom konačnosti rješenja. Brisanjem iz Registra se oduzima licenca društvu za reviziju.

### III. REGISTAR OVLAŠTENIH REVIZORA I REGISTAR DRUŠTAVA ZA REVIZIJU

#### Član 8.

Ministarstvo vodi Registar ovlaštenih revizora i Registar društava za reviziju u skladu sa čl. 56. i 57. Zakona, kojima su izdate licence Ministarstva.

Registar ovlaštenih revizora sadrži:

1. ime i prezime, adresu, jedinstveni matični broj, registarski broj (broj licence), datum izdavanja i rok važenja licence,
2. naziv tijela koje je izdalo certifikat,
3. naziv i adresa društva za reviziju, gdje je ovlaštenu revizor zaposlen, odnosno s kojim je povezan kao partner ili angažiran na drugi način.

Registar ovlaštenih revizora sadrži podatke posebno pod "A - aktivni" za ovlaštene revizore koji su zaposleni u društvima za reviziju, ili angažirani na drugi način od strane društva i posebno pod "B - neaktivni" za ovlaštene revizore koji posjeduju certifikat/licencu ovlaštenog revizora, a nisu zaposleni niti su angažirani na drugi način od društva/društava za reviziju.

Registar društava za reviziju sadrži:

1. naziv društva, adresa i registarski broj;
2. pravni oblik i imena lica ovlaštenih za zastupanje;
3. kontakt podatke, kontakt osobu i web adresu;
4. adresu svih ureda u državi;
5. ime i prezime te registarski broj svih ovlaštenih revizora koji su zaposleni u društvu za reviziju, ili su s njime povezani kao partneri ili na drugi način;
6. ime/na i poslovna adresa/e osnivača/dioničara društva;
7. struktura učešća osnivača u kapitalu društva;
8. imena i poslovne adrese svih članova uprave odnosno nadzornog odbora;
9. članstvo u mreži i nazive i adrese društava članica i povezanih društava, odnosno uputa o mjestu gdje je takav podatak javno dostupan.

Društva za reviziju su dužna da prijavljuju Ministarstvu promjene u podacima iz stava 4. ovoga člana, u roku od 30 dana od nastanka promjene, radi evidentiranja u Registru.

#### Član 9.

Registarski brojevi ovlaštenih revizora i društava za reviziju iz člana 8. st. 2. i 4. ovoga Pravilnika, dodijeljeni upisom u Registre se neće mijenjati niti se isti registarski broj može naknadno dodijeliti drugom ovlaštenom revizoru, odnosno društvu za reviziju.

Registarski broj ovlaštenog revizora se sastoji od deset brojeva, a generira se na sljedeći način: jednocifreni broj: "3", dvocifreni broj oznake kantona (za Distrikt Brčko dvocifreni broj "11", a za Republiku Srpsku dvocifreni broj "12"), četverocifreni tekući broj (vodeće nule, plus broj upisa predmeta), dvocifren broj godina upisa predmeta i jednocifreni kontrolni broj određen postupkom Modula 10.

Registarski broj društva za reviziju se sastoji od deset brojeva, a generira se na sljedeći način: jednocifreni broj: "9", dvocifreni broj oznake kantona (za Distrikt Brčko dvocifreni broj "11", a za Republiku Srpsku dvocifreni broj "12"), četverocifreni tekući broj (vodeće nule, plus broj upisa predmeta), dvocifren broj godina upisa predmeta i jednocifreni kontrolni broj određen postupkom Modula 10.

#### IV. PRIJELAZNE I ZAVRŠNE ODREDBE

##### Član 10.

Izuzetno, u skladu sa članom 72. stav 3. Zakona ovlašteni revizori koji posjeduju licencu izdatu prije stupanja na snagu Zakona dužni su podnijeti zahtjev uz ispunjenje uslova iz člana 4. ovog Pravilnika zaključno sa 08.04.2010. godine.

Društva za reviziju kojima su izdate licence prije stupanja na snagu Zakona dužna su Ministarstvu zaključno sa 07.07.2010. godine dostaviti zahtjev za obnavljanje licence uz ispunjenje uslova iz člana 6. ovoga Pravilnika, te nakon obrade bit će im dodijeljen novi registarski broj.

##### Član 11.

Ministarstvo će uspostaviti bazu podataka ovlaštenih revizora i društava za reviziju kojima je izdata licenca u skladu sa Zakonom i to:

1. za ovlaštene revizore i društva za reviziju kojima su izdate licence do stupanja na snagu Zakona, a na osnovu dokumentacije koja je bila dostavljena uz podnošenje zahtjeva;
2. za ovlaštene revizore i društva za reviziju koji u propisanim rokovima iz člana 10. ovog Pravilnika podnesu zahtjeve za obnavljanje licenci;
3. za ovlaštene revizore i društva za reviziju koji prvi put podnose zahtjeve za izdavanje licence, uz prilaganje potrebne dokumentacije u skladu sa Zakonom i ovim Pravilnikom.

Podaci iz stava 1. ovoga člana koji se upisuju u Registar ovlaštenih revizora i Registar društava za reviziju su javni i objavljujuće se na web portalu Ministarstva po završetku prikupljanja i obrade podataka za ovlaštene revizore i društva za reviziju.

##### Član 12.

Profesionalno tijelo je obavezno u roku od 30 dana po isteku prethodne godine dostaviti Ministarstvu Pregled ovlaštenih revizora koji su ispunili uslove profesionalnog razvoja i kontinuirane profesionalne edukacije.

Član 13.

Stupanjem na snagu ovog Pravilnika prestaje da važi Uputstvo o postupku licenciranja revizora i revizorskih društava ("Službene novine Federacije BiH", br. 72/05, 35/06 i 49/06).

Član 14.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".

---

Broj		04-02-1245/10
mart	2010.	godine
Sarajevo		

---

Ministar  
**Vjekoslav Bevanda**, s. r.

**ZAHTJEV**  
za izdavanje/obnavljanje (precrtati nepotrebno) licence  
(dozvole za rad) ovlaštenim revizorima

1.	Ime i prezime:	
2.	JMBG:	
3.	Adresa: /entitet, kanton, općina, ulica /	
4.	Kontakt podaci: tel., fax, e-mail	
5.	Naziv tijela koje je izdalo certifikat, broj i datum certifikata	
6.	Broj licence (odgovarajućeg dokumenta) izdate u stranoj zemlji, Republici Srpskoj, Brčko Distriktu BiH	
7.	Naziv društva za reviziju i registr. broj društva u kojem je zaposlen	
8.	Naziv društva / društava / i registr. broj u kojem je angažiran na drugi način od strane društva	
9.	Broj postojeće licence	

Prilozi iz čl. 3. ili 4. Pravilnika o načinu i uslovima izdavanja, obnavljanja i oduzimanja licence ovlaštenim revizorima i revizorskim društvima.

Mjesto i datum:

\_\_\_\_\_

Podnosilac zahtjeva:

\_\_\_\_\_

**ZAHTJEV**  
za izdavanje/obnavljanje (precrtati nepotrebno) licence  
(dozvole za rad) društvima za reviziju

1.	Naziv društva	
2.	Adresa: /entitet, kanton, općina, ulica / Web adresa	
3.	MBS	
4.	Pravni oblik i ID broj( porezni)	
5.	Kontakt osoba	
6.	Kontakt podaci (tel. faks, e-mail)	
7.	Adrese svih ureda u državi	
8.	Ovlašteni revizori društva: Ime i prezime, adresa, registarski broj	
9.	Članovi/dioničari društva: Ime i prezime, poslovna adresa	
10.	Članovi uprave/nadzornog odbora: Ime i prezime, poslovna adresa	
11.	Naziv društva/društava članica mreže, adresa, dodatne informacije	
12.	Broj licence (postojeće)	

Prilozi iz člana 6. Pravilnika o načinu i uslovima izdavanja, obnavljanja i oduzimanja licence ovlaštenim revizorima i revizorskim društvima.

**Napomena:**

Pod red. br. 3. upisuje se broj subjekta pod kojim je društvo registrirano u sudskom registru.

Pod red. br. 8. upisuje se registarski broj ovlaštenih revizora dodijeljen upisom u registar Ministarstva.

Pod red. br. 9. i 10. upisuju se podaci za svakog člana pojedinačno.

Pod red. br. 11. upisuju se nazivi i adrese društava članica i povezanih društava, odnosno uputa o mjestu gdje je takav podatak javno dostupan.

Mjesto i datum:

\_\_\_\_\_

Podnosilac zahtjeva:

\_\_\_\_\_



BOSNA I HERCEGOVINA  
FEDERACIJA BOSNE I HERCEGOVINE  
FEDERALNO MINISTARSTVO FINANSIJA  
FEDERALNO MINISTARSTVO FINANCIJA

BOSNIA AND HERZEGOVINA  
FEDERATION OF BOSNIA AND HERZEGOVINA  
FEDERAL MINISTRY OF FINANCE

Na osnovu člana 57. Zakona o računovodstvu i reviziji u Federaciji Bosne i Hercegovine („Službene novine Federacije BiH“ broj: 83/09) i u skladu sa odredbama čl. 3. i 4. Pravilnika o načinu i uslovima izdavanja, obnavljanja i oduzimanja licenci ovlaštenim revizorima i društvima za reviziju („Službene novine Federacije BiH“ broj: \_\_\_/10), Federalno ministarstvo finansija-Federalno ministarstvo finansija

*izdaje*

# L I C E N C U

OVLAŠTENOM REVIZORU

(ime i prezime)

NA OSNOVU KOJE OSTVARUJE PRAVA I PREUZIMA OBAVEZE  
DA OBAVLJA REVIZIJU U SKLADU SA ZAKONOM

Ova licenca važi do \_\_\_\_\_ godine.

Imenovan je upisan u Registar ovlaštenih revizora pod registarskim brojem: \_\_\_\_\_

Sarajevo, \_\_\_\_\_ godine

**M I N I S T A R**

BOSNA I HERCEGOVINA  
FEDERACIJA BOSNE I HERCEGOVINE  
FEDERALNO MINISTARSTVO FINANSIJA  
FEDERALNO MINISTARSTVO FINANCIJA

BOSNIA AND HERZEGOVINA  
FEDERATION OF BOSNIA AND HERZEGOVINA  
FEDERAL MINISTRY OF FINANCE

Na osnovu člana 55. Zakona o računovodstvu i reviziji u Federaciji Bosne i Hercegovine („Službene novine Federacije BiH“ broj: 83/09) i u skladu sa odredbama čl. 3. i 4. Pravilnika o načinu i uslovima izdavanja, obnavljanja i oduzimanja licenci ovlaštenim revizorima i društvima za reviziju („Službene novine Federacije BiH“ broj: \_\_\_/10), Federalno ministarstvo finansija-Federalno ministarstvo finansija

*izdaje*

**L I C E N C U**

*DRŽAVNOJ ZAJEDNICI*

(naziv društva)

NA OSNOVU KOJE OSTVARUJE PRAVA I PREUZIMA OBAVEZE  
DA OBAVLJA DJELATNOST ZA KOJU JE REGISTROVANO

Imenovano društvo je upisano u Registar revizorskih društava pod registarskim brojem: \_\_\_\_\_

Sarajevo, \_\_\_\_\_ godine

**M I N I S T A R**

---